



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

Reziaun Espesial Oecussi

25 Agostu 2015

Komunidade Suku Beneufé ezije Parlamentu Nasional atu aselera diskusaun no aprovasaun ba Proposta Lei ba Rai ne'ebe pendentí

Iha 21 Agostu 2015, JSMP organiza treinamentu kona-ba “Demokrasia no Kna’ar Parlamentu iha prosesu halo Lei” iha Suku Beneufé, Postu Administrativu Nitibé, Reziaun Espesial Oecussi. Treinamentu ne’e hetan partisipasaun másimu husi komunidade no estruktura suku sira. Total partisipantes ne’ebé partisipa iha treinamentu ne’e hamutuk nain 30; kompostu husi Feto nain 7 no mane nain 23.

Durante treinamentu komunidade sira hato’o sira nia preukupasaun kona-ba kazu rai ne’ebe akontese iha sira nia suku no nia prosedimentu ba rezolusaun disputa ne’ebé kontinua la klaru. Situasaun sira ne’e hamosu konflitu entre komunidade iha suku refere. Tamba ne’e sira husu atu Parlamentu Nasionál tenki aselera prosesu diskusaun ba esbosu Pakote Lei ba Rai nian hodi aprova atu bele sai bazé legal ba povu hodi uja atu bele rezolve problema rai iha suku laran.

“JSMP konsidera ejjensia komunidade atu aselera prosesu diskusaun ba esbosu Pakote Lei ba Rai ne’e, importante tebes ba parlamentu atu fináliza hodi nune’e bele fasilita povu atu rezolve probelma rai entre komunidade ho komunidade inklui estadu no kompania tuir provizaun lei ne’ebé sei estabese iha lei refere, dehan Diretór Ezekutivu JSMP, Luis de Oliveira Sampaio.

Iha okaziaun ne’e JSMP mós apresenta katak ezbosu Pakote Lei ba Rai ne’ebé inklui Espropriasaun la representa povu tomak nia interese, injustu tanba la iha estudu ne’ebe klean no sei fó kbiit no oportunidade barak liu ba estadu hodi okupa rai nomós sei hamosu indemnizasaun ne’ebé la justu. Ne’e bele kauza ba moris espropriadu sira nian sai aat liu fali uluk no mós sei bele halakon valór kulturál no lulik balun ne’ebé la bele selu ho osan.

JSMP rekomenda ona antes iha submisaun JSMP nian ba Parlamentu Nasionál atu halo peskiza klean ba esbosu lei refere no halo audensia ho entidade xavi sira hodi rona preukupasaun no sujestaun atu bele produs lei ne’ebe iha kualidade no representa povu tomak nia interese.

Iha inseramentu ba treinamentu ne’e, Xefi Suku Beneufé, Sr. Antonio S.S de Carvalho agradese no konsidera importante tebes prezensa JSMP hodi fahe informasaun ba nia komunidade atu komunidade sira bele hatene no kompriende lei aplikável sira no dezafiu sira iha setor justisa

Rua setubal, Colmera, Dili Timor Leste

PoBox: 275

Telefone: 3323883

www.jsmp.tl

Facebook: www.facebook.com/timorleste.jsmp

Twitter: @JSMPtl

formal. Sr. Carvalho rekomenda ba partisipante sira atu kontinua fahe informasaun hirak ne'e ba comunidade sira ne'ebe la partisipa iha treinamentu ne'e.

Treinamentu ne'e hetan Apoiu Finansieru husi VI Governu Konstitusional, liuhosi Kordenador Gabinetei Apoiu Fundu Sociedade Sivíl.

Atu hetan informasaun kle'an favór kontaktu direktamente:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
Landline: 3323883 / 77810637